

ratur: & si album præparatum est, tunc in rubrum commutatur: rubrum namque sub albo occultatum est, rubrumque album sequitur, non secus ac album nigrum sequitur, in quo tota ars consistit. Hisce tandem concludit Philosophus, & ait: Hæc ars solummodo fit cum summo aceto, à potestate diuina, & operis perfectione: Innuens artem dumtaxat vna ex re elaborari, quæ cum acerri- mo aceto comparatur, per rorem Philosophiæ colligitur, & præparatur, quod acetum, per diuinam gratiam, operisque perfectionem, institutum est, vtpote per præparationem ex aceto commutatur in summum bonum, cœli, atque terræ, quod bonum etiam ab vniuerso terrarum orbe, eiusdemque omnibus Regibus & Principibus nunquam persolui poterit.

EXPLICATIO DICTI ISINDRI.

PRoh Deum immortalem, quam mirabili modo Philosophi hanc rem occultarunt: adeo vt multo esset melius, quod à scribendo omnino cessauissent. Multos enim id ad extremam inopiam redegit, nec paucos etiam adhuc cottidie in summam paupertatem præcipitat, præsertim omneis eos, qui imprudenter, & sine vlllo intellectu, laborant, nec vel initium, medium, neque finem, immo nequidem posteriorem, vel anteriorem partem rerum istarum norunt. Verum Philosophi vere recteque scribunt. Quis illud autem intelligat siue comprehendat, qui rerum istarum fundamentum ignorat: nemo mortalium equidem, etiam si esses Doctor Doctorum, & Lux Mundi, nihilominus tamen heic omnino cæcus esset.